

UXQ'UEJLEL BA JUN TSA' BA I TS'IJBU JUAN

Weñach mi' tyaj ti t'an Gayo

1 ¹ Joñon ancianojon. Chancol ts'ijbubeñet jun p'untyabilet ba c pi'al Gayo ba a c'aba'. Melelach chancol c p'untyañet.

² P'untyabilet ba hermañu, mic tyajet ti oración cha'an wen ma' wajñel yic'ot cha'an c'oq'uet ma' wajñel je'el. Como cujilach isujm wen c'oc'ach a ch'ujel.

³ C'ajacñajax coj ti cubi che' ñac ti juliyo ili hermañujob como mi' subeñoño chancox a wen ch'ujbin jini mel ba t'an.

⁴ Ñoj c'ajacña coj mi cubin che' an majch mi' subeñoñ mi chancol i wen ch'ujbiño ili mel ba t'an calobilob. Mach'an yan tyac ba cha ba am ba ti mulawil mu' ba i más yac'ueñoñ c'ajacña ba coj che' mi cubin xuc'ul añetla.

⁵ P'untyabilet ba hermañu, weñach ma' mel che' ma' pay ochel ti a wotyot hermañujob mu' ba i c'otyelob.

Machicach a caña pero much a wotsan ti a wotyot.

⁶ Como jini hermañujob tsa' ba juliyo w'a'i ti' subeyob ili hermañujob mu' ba i much'quiño i ba bajche' ti a p'untyayob. Awocolic cotyaño ti cha ba c'ajñibal i cha'año cha'an bej majlicob. Jiñach bajche' yom Dios.

⁷ Como ti caj Jesucristo ti majliyob ti subt'an ñumel. Ma'an cha ba yes mi' saj ch'amob ya' ba'año jini max tyo ba i ch'ujbiño i t'an Dios.

⁸ Jin cha'an joñoñla yom mi laj cotyaño ti cha ba tyo jach yom i cha'año cha'an che' jini chancox laj cotyan ti sub ñumel jini mel ba t'an.

Mach wen mi yajñel Diótfrefes

⁹ Tsa'ix c ts'itya' ts'ijbubeyob hermañujob ya' ba' añetla bajche' yom i melob. Pero jini winic Diótfrefes ma' mi' jac'beñoñ lojon c t'an como mi' mulan i yotsan i ba ti yumal ti' tyojlelob.

¹⁰ Jin cha'an che' mij c'otyel ya'i mux quej c lu' suben como cha'an mach wen jini chancol ba i mele' como mu' ti jop't'an tij contra. Mu' ti lot je'el. Mach jinic jach jini pero ma' mi yotsaño ti yotyot jini hermañujob. Che' je'el mi' tic'ob jini yom ba i yotsaño. Mi ti' wersa otsayob, mi' chocob loq'uel ti' tyojle hermañujob jini tsa' ba i yotsa i jula'.

¹¹ P'untyabilet ba hermano, mach yom ma' mel jini mach'a wen. Chac mele jini wen ba. Jini wen ba i cha'libal mi' pas mi yoque i cha'añach Dios. Jini mu' ba i pas i simaronlel mach i caña cha ba yom Dios.

Wen ba pasoñel i cha'an Demetrio

¹² Ti pejtyelelob weñach mi' tyajob ti t'an jini winic Demetrio. Mi' tsictiyel ti wen ba i cha'libal mi melelach. Joñon lojon cujil isujm bajche' mi yajñel ti uts'at. Jatyetla je'el la' wujil melelach lojon c t'an.

Cojix ba t'an tyac

¹³ Añach tyo cabal t'an com ba c subeñetla, pero mach comox c ts'ijbun.

¹⁴ Mu' tyo c pijtyan jintyo mij q'uelet cha'an mic pejañet.

¹⁵ La' ajniquet ti ñach'al. Ili lac pi'alob w'a'i yom bi i chocbeñetyob tyalel saludos. Awocolic aq'ueñoñ saludos pejtyel lac pi'alob ya'i.